

第一冊

風淫病案

全

名醫驗案類編

正編

上海大東書局印行

何廉臣編

全國名醫驗案類編

上海大東書局印行

夏序



昔司馬遷爲淳于作傳詳紀治驗病案凡數十則脉因症治瑣屑無遺其殆後世醫案之濫觴歟蓋以醫雖小道輒寄死生不讀書不足以明理徒讀書不足以成用不讀書不知規模不臨症不知變化良以體質各異病變不常呆守成方必多貽悞雖飽若孝先之腹笥亦徒成趙括之兵書耳案者治病之實錄臨症之南針也書多空泛率意而爲論雖奇不能必其有用理雖足不要決其可行案則事實具在難於假借讀書不如讀案古人已有言之者惟是世傳醫案多於牛毛凡屬名家必有專刻雖見仁見智各有不同然普通所不免者有數弊在研辭琢句儷白俳黃或則洋灑千言或則寥落數字但論詞華不言醫理舉凡病理病症診斷處方均所不問徒誇詞藻之工實乖醫案之例乃一二文學之士倡之於前便佞之徒步之於後相傳輾轉風氣遂成此一弊也理無全

勝學有專長但出一編必求全品徒誇博洽不問精麤其方之合否不顧也其治之效否不顧也以多爲貴以博爲能如靈胎所謂記帳簿子者此二弊也上工全九中工全八症有不治藥無十全乃好大喜功侈言治驗或出門人之手爲師諱過或屬自編之案爲己掩瑕僞造驗方妄言效案一若有治必愈無病不痊大言炎炎欺人欺世後人得之眞贗難辨此三弊也零縑斷錦賸玉殘金首尾不全始末無考雖珍敝帚終屬殘葩病變之轉移無尋治療之步驟莫考其效其否固不可知其是其非又焉能曉此四弊也更或有案無方但仰高深而莫測更或有方無案徒瞻方藥而興嗟凡此諸端悉爲通病各家名集均所不免此則好學之士所心憂習醫之流所擧蹙者歟 廉臣先生越水名家醫林前輩刻有全國名醫驗案之輯將以補苴前失嘉惠後來意至美也不棄鄙愚書來乞序僕濫竽海上竊吹醫林閱人雖多究未澈天人之奧濟世縱急恨難銷塵世之祲睹此瑤篇歎爲觀止反復尋玩覺其取舍謹嚴收羅宏博評釋

精確編製新奇如掌觀螺如眉列岫一洗古人之積弊能垂後學爲楷模其用心之細編製之精誠爲昔人所未夢見而况一時俊彥盡入藥籠全國勝流都登簡冊凡諸作者盡屬名家今人固不讓於古人一編竟可敵乎萬卷千絲成錦百花成蜜皇然巨製蔚爲大觀談醫者手此一編其不亞於掌中珠枕中祕乎是爲序古邗夏應堂

丁序

醫之有案由來尙矣自伊尹製湯液仲景論傷寒綱舉目張千古方案之楷模粲然大備降而愈下文字日繁號稱名醫者幾無人不可醫案然或敘其初而遺其終或備其方而略其效語焉不詳識者病焉越邦何廉臣先生國醫手也其治效之捷敏固早彰彰在人耳目矣顧乃欲然不自足徵求全國名醫驗案彙纂成編出而問世將以收集思廣益之功而符聲應氣求之義用力至勤用意甚盛其有裨於醫界者豈淺尠哉福保亦嘗從事於醫在二十年前與先生頗有相知之雅而當時之以醫學相往還者如李先生平書蔡先生小香等皆相繼謝世遺書俱未刊行頗有身後寂寞之嘆今獲覩斯編之成於欣慰之餘又不勝身世今昔之感矣方今世界各國科學之進步一日千里卽以醫論歐化東漸幾有奪我而代之之勢苟不急起直追取固有之藝能發揮而光大之

將恐國粹淪亡而我四萬萬人之生命胥寄托外族之手言念及此不寒而慄
自今以往自當策厲駑鈍與先生同上醫學競爭之戰線尤願與全國名醫共
勉之羣策羣力以紹岐黃之統緒中國醫學庶有豸乎請以是編爲左券也可
是爲序

民國十八年三月無錫丁福保識

丁福保

徐序

嘗聞選輯之難甚於自著觀於醫學一門而益信矣吾國醫書著者綦多門類不必皆全體例不必皆善而發揮個性靡不各有其特色獨至選本則彙萃羣言折衷至當非學識目光超過古人之上不克勝任愉快以六科準繩之博大不及張氏醫通之精確以名醫類案之名貴不及續名醫類案之審慎選輯之難蓋如是矣曾見近日新出所謂某某醫案者所選燥病一門竟有全用香燥溫燥者以燥治燥寧非誤盡蒼生此由操選政者學識未至而徒以是書爲宣傳之舉也醫之經驗豐富者日診數十百人非必重大之症皆可一一著爲治驗也必其治有特異之點爲古籍所未及詳者而其治法用藥亦能別出心裁戛戛獨造理法謹嚴心思靈變者始有立案之價值蓋所以立案昭示來許可爲後學法程非自伐其能藉是爲宣傳之資料而已大東主人所出名醫驗案

類編一書雖爲近人治驗而首尾完具較之昔賢治驗尤爲切近操選政者又屬何廉臣前輩年高德劭舊學旣夙有根柢新學又熟知門徑以主選政允無媿色裨益後學厥功甚偉吾知此書一出不脛而走可以預卜尙望得是書者先於內難傷寒金匱歷代名家言生理病理診斷治法藥性方法爲深刻之研求諳其正病正治至其中後變化然後研究昔賢醫案並參諸是書以長闕歷以當實驗庶幾有體有用不至得魚而忘筌倒果而爲因則于大東主人廉臣前輩之用心爲不負矣若絕無根柢不知先後而欲借逕于醫案以求速成則不揣其本而齊其末非不佞之所敢知亦非昭示來許之苦心也

民國十八年一月二十二日徐相任序

陸序

編醫書難編醫案尤難編他人之醫案則難之尤難夫案者按也按其脈按其症非有真知灼見洞悉病源斷難貿然處方攷之古籍醫案之最古者莫如倉公傳之二十餘案馬遷非醫者而詳敘脈症無微不顯無隱不彰如尺脈上魚際欲男子而不得其精微何如乎後漢張仲景著傷寒雜病論十六卷其詳敘症脈極纖極微迄今攻醫者無不奉爲圭臬以雖非醫案而按脈按症較之醫案實有過之無不及余於古人醫案最喜讀徐洄溪吳鞠通王潛齋三書蓋此三書皆三子所親編雖洄溪鞠通潛齋未必能盡愈諸病而醫案所載則皆治驗心得之症讀之可以見前輩治病之手眼足資借鏡者也今上海大東書局有全國名醫驗案類編之輯有案皆驗無方不靈當風雨晦明之日靜坐斗室手批是編不啻聚羣彥於一堂而得親其警欬洵可樂也至採輯之嚴而不濫

分類之精而不瑣較之江氏名醫類案魏氏續名醫類案實無愧色夫編他人之醫案而能精確如是不難之尤難乎因樂而爲之序

民國十有八年一月十五日青浦陸士諤序

秦序

秦子曰醫之價值當求諸實驗之結果何以故說文云醫治病工也既爲治病工則其責任但求能治病治病結果之良窳卽爲其價值初不必斤斤於流派之爭也彼中醫自詡爲哲學醫西醫自詡爲科學醫以僕視之哲學本身固不能治病卽科學本身亦奚能起疾同一僥倖試驗而互以哲學科學爭修短其價值果何據耶僕初治文學繼而攻醫舉各家學說讀之若有所得又取西說閱之胸襟豁然偶爲文章自信可敵千人迨十年來臨診之結果覺古人之言可信而不可信昔之驕人者且斂抑不自禁蓋學說實驗之別不足爲外人道如此語曰醫不三世不服其藥又曰九折肱爲良醫又曰熟讀王叔和不如臨診多詢有得之言哉更徵諸今日西醫之攻訐中醫無所不至而中醫在社會果未嘗失去固有之位置抑且信仰者益加衆無他中醫實驗之結果足以制

勝西醫也故僕以爲實驗之結果卽醫學之價值結果之完美卽醫學之進步
醫案者結果之表現也驗案者價值之真據也嘗本斯意久欲以切實之文字
介紹于世人爰于去歲編印清代名醫醫案精華一書行世乃今歲大東書局
主人持當代名醫驗案類編索序于余觀其緒論使醫者受實益病家資啓發
不禁喜其用心之不謀而合更觀其編次分四時六淫八大傳染又不禁歎其
分析之新穎精密焉僕局處江濱愧無建樹對此奚僅興天涯知己之感實足
爲今之好高論而不務實際者當頭棒喝乃不辭而爲之序
中華民國十八年一月二十五日上海秦伯未書于新中醫社

丁序

醫學之道明理爲先其次辨證其次用藥是三者不可廢其一也世之有自詡以爲醫學淵博者考其醫理則明晰有餘而及其臨證則往往致誤不淺者何也蓋彼惟知株守故書而未曾微細揣摩于辨證用藥之中也夫求辨證用藥之得當豈易言哉非有宏富之經驗精密之考察則每每失誤毫釐鑄成大錯所謂庸醫殺人者蓋大多如此也大東書局主人有鑒于此亟圖挽救其弊特請越中宿醫何廉臣先生薈萃多方編集成帙皆名醫一生經驗之所得外感六淫八大傳染無不咸備精選細校有美皆臻非惟可以作學醫者之津梁卽素鮮醫學知識者亦可藉以觀米知山爲康健之指南允宜人人手執一編則人人悉登壽域庶不負編此書者願人長壽之初衷而吾國東亞病夫之誚亦

庶幾可以免夫是爲序

中華民國十八年一月丁惠康序于上海肺病療養院

（The following text is extremely faint and largely illegible due to fading or bleed-through from the reverse side of the page. It appears to be a preface or a long inscription, possibly related to the establishment of the Shanghai Tuberculosis Sanatorium mentioned in the title above. It contains several lines of vertical text, but the characters are too light to transcribe accurately.)

（This block contains very faint characters, likely bleed-through from the reverse side of the page. The characters are difficult to discern but appear to be part of the same text as the main body of the page.)

郭序

醫有道理莫精於素問醫有法法莫備於仲景顧素問詳於養生而畧於治病不僅足爲醫家之模範已也仲景之傷寒雜病論金匱要畧則窮原竟委移步換形舉凡病情之正變順逆與夫誤治之爲險爲壞爲陰陽易爲勞復食復靡不曲折詳盡以求至當蓋傷寒金匱者後世醫案之權輿也越中名醫何君廉臣沈浸古籍固已着手皆春馳聲遐邇者矣又痛近代粗工鹵莽滅裂草菅人命乃類編全國名醫驗案條分縷析不厭求詳將壽之梨棗以爲一知半解者痛下針砭寓書乞予序之慨自海通以來白人挾其物質之文明陵躐吾國由政治經濟之落後而鄙夷且及於學術中醫一道遂爲世所詬病不知吾國醫學實遠勝於歐美姑以勞證一端言之彼輩萃無量數之名醫迄未發明治勞之法與其應用之藥品我國二千年前之仲景已立剛性以建中爲主柔性以白虎爲主之治勞兩大法日月不磨如算學家之有公式焉自李東垣著脾胃

論以升柴者蓮爲主大吹特吹自詡爲升發東方震卦甲木之清氣究之以燥濟燥否結之弊百出後世不察奉爲圭臬而仲景之剛性治勞法止自張景岳創八陣以冬地膠膩填下爲說伊尹割烹易牙調味陳修園雖著論非之後人喜其濃厚謂可以滋陰而配火助淡黏礙消化至死不悟而仲景之柔性治勞法止朱丹溪謂陽常有餘陰常不足又謂產後以大補氣血爲主雖有他證以末治之其謬與景岳等拜金主義之庸工以其言足以迎合富貴人之心理視爲金科玉律終身吃着不盡然與仲景治虛勞皆有桂枝及以竹葉石膏治病後虛羸少氣以竹皮大丸治婦人乳中虛安中益氣等說大相背馳不學無術殺人如麻中醫之不振誰之咎歟何君此編以實事求是爲依歸以條目詳明爲程式原始要終纖悉罔遺是真有合於素問仲景之心法矣復古道昌醫學以戰勝於世界夫豈異人任哉予故歡喜贊歎不敢以蕪陋辭而爲之序

大中華民國十八年一月瑞安奇遠郭弼拜序